

**10/2025 TXOSTENA, APIRILAREN 1EKOA, KONTRATAZIO PUBLIKOAREN
AHOLKU BATZORDEAREN BATZORDE IRAUNKORRARENA.****XEDEA: AGINDU-PROIEKTUA, OGASUN ETA FINANTZETAKO ETA ETXEBIZITZA
ETA HIRI AGENDA KO SAILBURUENA, ETXEBIZITZA ETA HIRI AGENDA
SAILAREN KONTRATAZIO-MAHAIAREN OSAERA EZARTZEN DUENA.****I.- AURREKARIAK.**

2025eko martxoaren 5ean, Etxebizitza eta Hiri Agenda Saileko Kontratazio Mahaiaren osaera ezartzen duen Ogasun eta Finantzetako eta Etxebizitza eta Hiri Agendako sailburuen agindu-proiektuari buruzko txostena eskatu zen.

Eskaera Ondare eta Kontratazioko zuzendariari egin zitzaion, Euskal Autonomia Erkidegoko Kontratazio Publikoaren Aholku Batzordeko lehendakaria den aldetik.

Prozedurak elektronikoki izapidetzeko Tramitagune aplikazio informatikoaren bidez izapidetutako espedientean (erreferentzia: AAAA_ORD_668224_09), honako dokumentu hauek daude jasota:

- Ogasun eta Finantzetako sailburuaren eta Etxebizitza eta Hiri Agendako sailburuaren Aginduaren zirriborroa, Etxebizitza eta Hiri Agenda Sailaren Kontratazio Mahaiaren osaera ezartzen duena.
- Agindu horren zirriborroaren justifikazio-memoria.
- Aholkularitza Juridikoaren txostena.



II.- ESKUMENA.

Txosten hau nahitaezkoa da, Euskal Autonomia Erkidegoko Sektore Publikoaren Kontratazioaren araubidea ezartzeko uztailaren 27ko 116/2016 Dekretuaren 27.a) .2 artikuluan ezarritakoaren arabera; izan ere, agindu-proposamen bat da, kontratazio-mahai iraunkor bat edo kontratu anitzetarako eginkizunak izango dituen sortzeko.

III.- KONTRATAZIO-MAHAIEIEN ARAUBIDE JURIDIKOA.

Sektore Publikoko Kontratuen azaroaren 8ko 9/2017 Legeak (aurrerantzean, SPKL), zeinaren bidez Europako Parlamentuaren eta Kontseiluaren 2014ko otsailaren 26ko 2014/23/EB eta 2014/24/EB zuzentarauen transposizioa egiten baita Espainiako ordenamendu juridikora, 326. artikuluan kontratazio-organoari laguntzeko kide anitzeko organo gisa arautzen ditu kontratazio-mahaiak. Lege horren azken xedapenetako lehenengoaren arabera, 326. artikulua ez da oinarritzko legeria.

Euskal Autonomia Erkidegoko Sektore Publikoaren Kontratazioaren araubidea ezartzeko uztailaren 27ko 116/2016 Dekretuak 8. eta 9. artikuluetan arautzen ditu kontratazio-mahaiak. Lehenengo, kide anitzeko organo horiek eratzeko eta kideak izendatzeko arauak ezartzeko; bigarrena, organo horien eginkizunen irismena zehazteko.

Oro har, 8. artikulua xedatzen duenez, prozedura irekietan, mugatuetan eta prozedura negoziatu publikitatedunetan, kontratazio-organoek kontratazio-mahai baten laguntza izango dute, eta mahai horrek izango du eskaintzak baloratzeko eskumena. Gaineratu duenez, lizitazio-iragarkiak argitaratu beharrik ez duten prozedura negoziatuetan, kontratazio-organoak hautazkoa izango du kontratazio-mahaia eratzea. Kontratazio-organoari dagokio mahaiko kideak izendatzeko eskumena, Kontrol Ekonomikoko Bulegoaren ordezkaria izan ezik, bulego horretako titularrak izendatuko baitu.

Artikulu berean, 2. apartatuan, kontratazio-organoari laguntzeko organo horiek eratzeko arauak ezartzen dira, eta ezartzen da kontratazio-mahaiak presidente batek, idazkari-



lanak egingo dituen pertsona batek eta, gutxienez, hiru kidek osatuko dituztela. Eta gaineratzen du bokalen artean nahitaez egon beharko direla kontratazio-organoaren aholkularitza juridikoa eta aholkularitza teknikoa, eta kontu-hartzaile bat edo kontratazio-organoaren ekonomia- eta aurrekontu-kontrolako eginkizuna esleituta duen pertsona bat, hurrenez hurren.

Informazioaren eta Komunikazioaren Teknologien (IKT) ondasunak, azpiegitura teknologikoak eta zerbitzuak kontratatzen direnean, IKTen arloko eskumena duen zuzendaritzako pertsona batek parte hartu beharko du kontratazio-mahaian. Pertsona hori kontratazio-organo eskudunak izendatuko du, zuzendaritza horretako titularrak proposatuta.

Kontratazio-organoak hala eskatuz gero, Ondare eta Kontratazio Zuzendaritzako ordezkari batek ere parte hartu ahal izango du laguntza-organo horretan.

Kontratazio-mahaia osatzen duten pertsonak izendatzeko moduari dagokionez, aipatutako 8. artikularen 3. apartatuaren arabera, modu iraunkorrean edo espezifikoan egin daiteke, kontratu bakoitza adjudikatzeko. Eta ondoren zehazten du ezen, izendapen hori iraunkorra bada edo kontratu anitzetarako eginkizunak esleitzen bazaizkio, kontratazioaren alorrean eskumena duen saileko titularraren eta dagokion saileko titularraren edo erakundea atxikita dagoen saileko titularraren baterako agindu bidez ezarriko dela haren osaera, eta Euskal Herriko Agintaritzaren Aldizkarian argitaratuko dela.

Eta beste betekizun bat gehitzen du, ezartzen baitu osaera eta kideen identifikazioa kontratuaren administrazio-klausula partikularren agirian jasoko direla, eta dagokion kontratazio-organoaren kontratatzailearen profilean argitaratuko dela, kontratatzeko gaitasuna eta kaudimen- edo sailkapen-baldintzak betetzen direla egiaztatzen duen dokumentazioa kalifikatzeko egin behar duen bilera egin baino hamar egun lehenago, gutxienez.



IV.- KONTRATAZIO-MAHAIEN KONFIGURAZIOA.

Lehendakariaren ekainaren 23ko 18/2024 Dekretuaren arabera egindako Eusko Jaurlaritzako sailen berregituraketak sail bakoitzari esleitutako jardun-arloak eratu ditu, Etxebizitza eta Hiri Agenda Saila barne, zeina aipatutako dekretuan jasotako eginkizunek eta jardun-arloek osatzen baitute.

Hala, Etxebizitza eta Hiri Agenda Sailak 18/2024 Dekretuaren 13. artikuluan ditu zehaztuta bere eginkizunak eta jardun-arloak, eta, horren arabera, dekretu horren zazpigarren xedapen gehigarrian xedatutakoaren arabera, iraungitako Lurralde Plangintza, Etxebizitza eta Garraio Saileko organo eta unitateek osatuko dute, Zerbitzu Zuzendaritzako eta Azpiegitura eta Garraio Sailburuordetzako organo eta unitateek izan ezik.

Bestalde, sail horren funtzioen eta jardun-arloen zehaztapena Etxebizitza eta Hiri Agenda Sailaren egitura organikoa eta funtzionala ezartzen duen abenduaren 3ko 411/2024 Dekretuaren 6.3 eta 7.2-g) artikuluetan arautzen da, eta, beraz, ezinbestekoa da sail horretako kontratazio-organoei beren eskumeneko gaietan laguntzeko organoak birkonfiguratzeari.

Aurretik azaldutakoarekin bat etorriz, Eusko Jaurlaritzako sailak ekainaren 23ko 18/2024 Dekretuaren eta abenduaren 3ko 411/2024 Dekretuaren arabera berregituratu direnez, xedapen berri bat behar da, Etxebizitza eta Hiri Agenda Sailaren kontratazio-organoi lagunduko dion kontratazio-mahaiaren osaera zehazteko.

Era berean, aipatutako 411/2024 Dekretuaren 7. artikuluan ezartzen denez, Zerbitzu Zuzendaritzari dagokio sailaren eskumeneko kontratazio-espedienteak zuzentzea, koordinatzea eta izapidetzea, bai eta sailaren eremuan kontratazio elektronikoen prozedurak eta zerbitzuak kudeatzea eta hedatzea ere.



Era berean, jasotzen da Zerbitzuen zuzendaria izango dela sailaren kontratazio-organoa 5.000.000 eurotik beherako oinarrizko lizitazio-aurrekontua duten kontratuetan, eta eskuduna izango dela, baldintza berberetan, bitarteko propioei enkarguak egiteko, uztailaren 27ko 116/2016 Dekretuaren IV. tituluan aurreikusitako baldintzetan. Eginkizun horiek betetzean, muga horrekin berarekin dagokio gastuak baimentzea.

V.- AGINDU-PROIEKTUAREN EDUKIA.

Euskal Autonomia Erkidegoko Kontratazio Publikoaren Aholku Batzordearen txostenaren xede den agindu-proiektuak Etxebizitza eta Hiri Agenda Sailaren Kontratazio Mahaiaren osaera iraunkorra ezarri nahi du.

Agindu-proiektuak azalpen-zati bat, hiru artikulua, xedapen gehigarri bat, xedapen indargabetzaile bat eta azken xedapen bat ditu. Proiektu horrek errespetatu egiten ditu Euskal Autonomia Erkidegoko Sektore Publikoaren Kontratazioaren araubidea ezartzeko uztailaren 27ko 116/2016 Dekretuaren 8.3 artikuluan eskatzen diren arau-maila eta kontratazio-mahai iraunkorretako kideak edo kontratu anitzetarako eginkizunak esleituta dituztenak izendatzeko organo eskudunak.

Proiektu horren lehenengo artikuluan ezartzen denez, Etxebizitza eta Hiri Agenda Saileko kontratazio-organoek kontratazio-mahai baten laguntza izango dute esleipen-prozedura irekietan, mugatuetan eta negoziatu publikitadedunetan. Mahai horrek Euskal Autonomia Erkidegoko Sektore Publikoaren Kontratazioaren araubidea ezartzeko uztailaren 27ko 116/2016 Dekretuaren 9. artikuluko eginkizunak beteko ditu.

Era berean, artikulua horren a) letran, Saileko Ekonomia eta Aurrekontu Kudeaketako Arloko arduradunari edo Saileko Zerbitzu Zuzendaritzako Aholkularitza Juridikoko arduradunari esleitzen zaio Kontratazio Mahaiko lehendakaritza. Gaineratu duenez, postu hori hutsik badago, titularra kanpoan edo gaixorik badago edo legezko beste arrazoiren bat gertatzen bada, Saileko Zerbitzu Zuzendaritzako Ekonomia eta Aurrekontu Kudeaketaren Arloko edo Aholkularitza Juridikoko teknikari batek ordezkatu du.



Mahaiko kideei dagokienez, b) letran kontratazio-organoak izendatutako pertsona bat aipatzen da, aholkularitza teknikoa emango diona. Eta c) letran idazkari-bokal aholkulari juridikoaren figura jasotzen da. Zerbitzu Zuzendaritzako Kontratazio Arloko arduraduna izango da, eta bokal aholkulari juridikoaren eta mahaiaren idazkariaren eginkizunak beteko ditu, hitzarekin eta botoarekin. Lanpostu hori hutsik badago, bertaratu ez bada, gaixorik badago edo legezko beste arrazoiren bat gertatzen bada, Zerbitzu Zuzendaritzako Kontratazio Zerbitzuko teknikari batek ordezkatu du.

Era berean, d) letran Kontrol Ekonomikoko Bulegoaren ordezkaria aipatzen da. Pertsona hori uztailaren 27ko 116/2016 Dekretuaren 8. artikulua 2. apartatuaren lehen paragrafoaren azken tartekian aipatzen den kide «kontu-hartzailea» bada ere, esaldiaren amaiera kendu behar da (*«kontratazio-organoaren ekonomia- eta aurrekontu-kontrolaren funtzioarekin»*), eta honela utzi da testua: *«Kontrol Ekonomikoko Bulegoaren ordezkari bat, bulegoaren titularrak izendatua»*.

Era berean, e) letran, IKTen arloko eskumena duen zuzendaritzaren ordezkari bat ezartzen da bokal gisa, IKT ondasunak, azpiegitura teknologikoak eta zerbitzuak kontratatzen direnean. Kontratazio-organoak izendatuko du kide hori, zuzendaritza horretako titularrak proposatuta.

Lehen artikuluko horren f) letran ezartzen denez, aukeran eta kontratazio-organoak eskatuta, Ondare eta Kontratazio Zuzendaritzako ordezkari batek parte hartu ahal izango du organo horretan, zuzendaritza horretako titularrak proposatuta eta kontratazio-organoak izendatuta.

Agindu-proiektuaren bigarren artikuluan honako idazketa hau proposatzen da, indarrean dagoen araudira egokitzeko: *«Nolanahi ere, osaera eta kideen identifikazioa kontratuaren administrazio-klausula partikularren agirian jasoko dira, eta dagokion kontratazio-organoaren kontratatzailearen profilean argitaratuko da, kontratatze gaitasuna eta kaudimen- edo sailkapen-baldintzak betetzen direla egiaztatzen duten agiriak kalifikatzeko egin behar duen bilera baino hamar egun lehenago, gutxienez»*.



Beraz, ezin da aipamen orokor edo zehaztugaberik egin, ez eta ordezkatzeko duten edo zerbitzuak ematen dituzten administrazio, organismo edo erakundeari buruzko aipamenik ere.

Xedapen-zatiaren azken eta hirugarren artikulua ahalmena ematen dio kontratazio-mahaiari esleipen-prozeduretan esku hartzeko, baldin eta, kide anitzeko organo horien esku-hartzea nahitaezkoa izan ez arren, dagokion kontratazio-organismoak hala erabakitzen badu.

Bestalde, xedapen gehigarriak adierazten duenez, egin beharreko kontratuaren ezaugarriak kontuan hartuta, kontratazio-organismoak bi aukera izango ditu: agindu honen bidez modu iraunkorrean eraturako kontratazio-mahaiaren laguntza jasotzea, edo kontratu bakoitza adjudikatzeko kideak berariaz izendatzea; azken kasu horretan, haren identifikazioa kontratatzailearen profilean argitaratu beharko da.

Azkenik, proiektuaren xedapen indargabetzailean ezartzen da indargabetuta geratzen dela Ekonomia eta Ogasuneko sailburuaren eta Lurralde Plangintza, Etxebizitza eta Garraioetako sailburuaren 2022ko irailaren 22ko Agindua, Lurralde Plangintza, Etxebizitza eta Garraio Saileko Kontratazio Mahaia eratzeko; eta azken xedapenean arauaren vacatio legis arautzen da, eta Euskal Herriko Agintaritzaren Aldizkarian argitaratu eta hurrengo egunean jarriko da indarrean.

VI. ONDORIOAK

Azaldutakoagatik guztiagatik, ALDEKO TXOSTENA ematen zaio Etxebizitza eta Hiri Agenda Sailaren Kontratazio Mahaiaren osaera ezartzen duen agindu-proiektuari, betiere agindu-proiektuaren edukia txosten honetan azaldutakoari egokitzen bazaio.